

## SUPERRIGARDO PRI KODEJO

Rogener Pavinski

Estrarano pri Landa Agado de TEJO

01/06/2009

### Enkonduko

Fine de la pasinta jaro, TEJO lanĉis demandaron al siaj landaj sekcioj kaj aliaj junularaj organizoj. Ĝi nomiĝas KODEJO (Kompleta Demandaro por Esperantaj Junularaj Organizo) kaj ĝi estas nova versio ĝisdatigita surbaze de malnova demandaro nomata ALSTOM (Agado de Landaj Sekcioj en TejO-Mondo). Pere de ĝi ni celis kolekti gravajn informojn de la junularaj organizoj de nia movado.

Ĝi kolektas unue la informojn, kiuj ĉiam devas esti ĝisdataj por nia datumbazo kaj por la jarlibro de UEA, kiel aktuala estraro, aktualaj kontakt-informoj, ktp. Due, ĝi provizas aliajn interesajn informojn, kiuj ebligas al ni havi superrigardon pri la funkciado de niaj landaj sekcioj, i.a. pri la kotiz-sistemo, pri estrar-periodo kaj la rilato kun siaj nejunularaj tegmentaj organizoj.

La demandaro estis kreita per "Google Docs" kaj estis alirebla per reto en TEJO-retpaĝo. La reprezentantoj de la junularaj organizoj povis ĝin plenigi, kaj respondoj tuj eniris nian datumbazon. Al tiuj asocioj, kiuj ne posedis validan retadreson, ni sendis paperan kopion de la demandaro.

### Respondoj

El niaj kvardek kvin landaj sekcioj (LS-oj), nur dek naŭ plenigis la demandaron. Per tiu ĉi unua datumo, oni povas atesti ke ja multaj landaj sekcioj malaktivis. El tiuj, kiuj respondis, pri la stato de sia organizo, la respondoj estis jenaj: dekunu aktivaj (ĈEJ, SKEJ, IEJ, PEJ, GEJ, JEBUO, JEFO, BEJO, NJE, JEJ, FLEJA) unu dormanta (FEJO), sep vekigantaj (KEJ, JOTE, IREJO, NEJ, KEJA, JEB, JELI).



*Respondis jenaj LS-oj:*

*Pola Esperanto-Junularo (PEJ), Germana Esperanto-Junularo (GEJ), Junulara Esperantista Burundia Organizo (JEBUO), Korea Esperanto-Junularo (KEJ), Junulara Organizo de Togolandaj Esperantistoj (JOTE), Junulara Esperantista Franca Organizo (JEFO), Irana Esperantista Junulara Organizo (IREJO), Brazila Esperantista Junulara Organizo (BEJO), Nederlanda Esperanto-Junularo (NEJ), Kroatia Esperanto-Junulara Asocio (KEJA), Itala Esperantista Junularo (IEJ), Norvega junularo esperantista (NJE), Slovakia Esperanta Junularo (SKEJ), Ĉeĥa Esperanto-Junularo (ĈEJ), Japana Esperanto-Junularo (JEJ), Flandra Esperantista Junulara Organizo (FLEJA), Junulara Esperanto-ligo israela (JELI), Junularo Esperantista Brita (JEB), Finnlanda Esperantista Junulara Organizo (FEJO)*

Oni povas konsideri ke la aliaj dudek ses, kiuj ne respondis, estas en dormanta aŭ eĉ mortanta stato. Kvankam malpli ol duono de niaj LS-oj respondis al KODEJO, mi taksas la nombrojn kiel sufiĉan konsiderante ke estis la unua fojo, en kiu KODEJO aperis, kaj ke tio estas komenco de laboro kiu celas aktivigi niajn LS-ojn, kiuj estas en malaktiva stato, kvankam tio precipe dependas de la lokaj fortoj. Ni esperas ke fine de 2009 pli multaj respondos la demandaron.

### **Membraro**

La membraro de niaj LS-oj tre varias. Plejofte ili ne trapasas kelkdekojn da membroj. Vekiĝantaj asocioj kiel IREJO kaj KEJ ne atingas 20 membrojn, dum membraro de BEJO kaj PEJ ĉirkaŭas cent. Escepto estas GEJ, kiu kalkulas je proksimume 250 kotizantaj membroj.

Rimarkeblas ke JEBUO, kiu ĵus pasintjare estis akceptita kiel LS, havas unu el plej grandan membraron: 123, kiuj estas la junaj membroj de sia landa asocio. Tio konfirmas la lastatempan vigecon de la movado en Burundo, eta lando en Afriko.

Kvankam plej multaj (dek unu) deklaras ke siaj membroj pagas kotizon, ne restis klare ĉu por la cetero (ok), kies membroj estis deklaritaj kiel aligitaj kaj alispecaj, la aliĝo estas ja senpagaj. Verŝajne ne, ĉar ĉe la demando pri kiom foje siaj membroj kotizas, dek sep LS-oj respondis ke siaj membroj kotizas 1-foje jare, kaj nur ĉe du membreco estas sen kotizo (JELI, JEB). Tiu demando ja evidentiĝis ne tre preciza, kaj estas unu el plibonigendaj eroj por ĉi-jara demandaro.

### **Estrarperiodo**

Plej multe el niaj LS-oj elektas novan estraron ĉiujare (IEJ, FEJO, JEB, ĈEJ, JEFO, FLEJ, NEJ, KEJ, JELI, KEJA). Tio eble estas garantio ke ĉiam freŝaj homoj gvidas la organizojn, ĉar multo povas ŝanĝiĝi en vivo de junuloj de unu jaro al alia, tiel ke ili ne povas longe estri asociojn. JOTE, PEJ, GEJ, BEJO, NJE, SKEJ, IREJO elektas novan estraron ĉiun duan jaron. Escepto estas nur JEBUO, kies estrar-periodo daŭras tri


jarojn.

Male al tio, kion ni supozis antaŭe, ne estas iu pinta monato preferata, en kiu la LS-oj elektas novan estraron. Ĉiumonate krom aŭgusto okazas elekto en niaj LS-oj. Januare - GEJ, PEJ, JEBUO, Februare - KEJA, KEJ, FEJO, Marte - FLEJA, Aprile - JEB, IEJ, IREJO, Maje - SKEJ, Junie - NJE, Julie - BEJO, Septembre - JEFO, NEJ, Oktobre - ĈEJ, Novembre - IEJ, Decembre - JELI, JOTE.

### Informiloj

El tiuj LS-oj, kiuj respondis nian demandaron, kvar (JEBUO, JOTE, KEJA, JELI) ne havas iun oficialan informilon por liveri al siaj membroj. El la dek ses ceteraj, naŭ eldonas paperajn informilojn (KEJ, JEFO, IREJO, BEJO, NEJ, IEJ, FLEJA, FEJO, PEJ), tri eldonas ambaŭ paperajn kaj elektronikajn informilojn (GEJ, IEJ, NJE) kaj aliaj tri nur informas la membrojn elektronike (SKEJ, JEB ĈEJ).


### Aperritmo



Supra grafikaĵo montras aperritmon, kiun LS-oj eldonas siajn siajn oficialajn informilojn. Sep LS-oj eldonas siajn informilojn en ne tre regula aperritmo (SKEJ, JEBUO, JOTE, NEJ, KEJA, JELI, JEB) sed preskaŭ sama kvanto (ses) eldonas ilin pli ol kvarfoje jare (ĈEJ, KEJ, PEJ, KEJ, NJE, JEJ), kaj tio estas tre bona informo, ĉar tio signalas ke teni siajn membrojn informitajn kaj liveri periodaĵon ankoraŭ estas grava por niaj LS-oj. Ankoraŭ GEJ, JEFO kaj IREJO aperigas ilin 3 ĝis 4-foje jare kaj FEJO, BEJO kaj FLEJA inter 1 kaj 2-foje jare.

### Strukturo kaj rilatoj kun tegmentaj organizoj

Dekdu el niaj landaj sekcioj estas junulara sekcio de nejunulara organizo (BEJO, IEJ, IREJO, JELI, JOTE, KEJ, GEJ, PEJ, JEBUO, NJE, FLEJA, JEFO). Ses estas sendependa organizo kun jura personeco (NEJ, ĈEJ, KEJ, SKEJ, JEJ, FEJO) kaj unu estas sendependa organizo sen jura personeco (JEB).



*JSNO – Junulara Sekcio de Nejunulara Organizo*  
*SOJP – Sendependa Organizo kun Jura Personeco*  
*SOSJP – Sendependa Organizo sem Jura Personeco*

Kiam demanditaj pri la rilato, kiun ili havas kun siaj patraj aŭ maljunularaj organizoj, ili respondis ke rilatoj estas: Malbonegaj 0, malbonaj 1 (JOTE), sufiĉe bonaj 3 (IREJO, KEJA, FEJO), bonaj 10 (IEJ, JELI, GEJ, PEJ, BEJO, NEJ, FLEJA, JEFO, ĈEJ, NEJ), bonegaj 5 (KEJ, JEBUO, SKEJ, JEJ, JEB)

Nur unu LS-o (JOTE) asertas havi malbonan rilaton kun sia patra asocio pro kontraŭstaraj sintenoj. Por la aliaj, la kialo por tiuj “ne bona rilato”, estas la manko da komunikado (BEJO, KEJA) aŭ manko da komunaj interesoj (FEJO) kaj unu (NJE) asertis: “maljunuloj agas maljunege :). Tamen ĝenerale montriĝas ke tiuj pli aktivaj LS-oj havas bonajn rilatojn kun siaj tegmentaj asocioj aŭ kun la nejunularaj organizoj en siaj landoj.

### **Interna Komunikado**

El tiuj LS-oj, deksep havas retan diskutliston por la membroj (ĝi mankas al JOTE, JEBUO kaj KEJA) sed nur dekdu havas diskutliston por la estraro (ĝi mankas al FEJO, JELI, ĈEJ, NEJ, SKEJ, JOTE, KEJA kaj JEBUO). La estraro de naŭ asocioj kunvenas neregule per la reto (IREJO, IEJ, PEJ, JEFO, KEJ, FEJO, ĈEJ, SKEJ) sed ankaŭ naŭ aliaj ankoraŭ neniam rete kunvenis ĝis kiam plenigis la demandaron (GEJ, NJE, FLEJA, JEJ, JELI, NEJ, JOTE, KEJA, JEBUO). Nur du kunvenas ĉiumonate per la reto (BEJO, JEB).

Ŝajne la fizikaj kunvenoj de la estraro estas pli preferataj ol la retaj por kelkaj asocioj. Naŭ organizoj kunvenas pli ol dufoje jare (IEJ, PEJ, JEFO, KEJ, GEJ, FLEJA, JEJ, NEJ, JOTE) kaj ses kunvenas unufoje jare (BEJO, JEB, FEJO, ĈEJ, SKEJ, JEBUO). Du aliaj renkontiĝas dufoje jare (IREJO, KEJA), kaj lastaj du ne kunvenas eĉ unu fojon jare (JELI, NJE).

### **Renkontiĝoj kaj kongresoj**

Por multaj LS-oj la organizado de renkontiĝo estas la ĉefa aktivaĵo dum la tuta jaro. La plejmulto el niaj LS-oj okupiĝas pri organizado de landaj kunvenoj, kiuj ankaŭ ofte estas internaciaj. GEJ kaj PEJ ĝis nun organizis

siajn proprajn jarfinajn renkontiĝojn, nome IS kaj AS, sed ekde ĉi tiu jaro oni kune organizos JES-on. Ankaŭ KEJ kaj JEJ alterne kun Ĉina junularo, organizas jarfinan Komunan Seminarion. ĈEJ pasintjare organizis trejnseminaron, kaj ĉi-jare organizos IJK-n kune GEJ kaj PEJ. Gratulinda kunlaboro.

JEFO, GEJ, KEJA, FLEJA, IEJ, FEJO, NEJ, NJE kaj SKEJ organizas ofte siajn proprajn renkontiĝojn. BEJO, JOTE organizas landajn junularajn kongresojn. JELI, JEBUO kaj JEB havas neformalajn renkontiĝojn dum la jaro. Nur IREJO ankoraŭ ne organizas siajn proprajn renkontiĝojn. Espereble baldaŭ ankaŭ ili en Irano sukcesos kunveni.

### **Eksteraj rilatoj**

GEJ rilatas kun Germana Junulara Organizo kaj la Germana Ministerio por familioj, virinoj, junularo kaj pensiuloj. PEJ kreas rilatojn dum la organizado de Ago-Semajno kaj foje ĉe sukcesas subvenciadon por ĝi. IEJ havas rilaton kun Ministerio pri Aferoj Eksterlandaj tiel ke kelkaj italoj kaj eksterlandanoj povas ricevi partan repagon de vojaĝkostoj. Simile, en 2008 FEJO ricevis eksteran subvencion kaj per ĝi sendis du esperantistojn al IJF.

Krom SKEJ kaj ĈEJ, kiuj havas mapli praktikajn eksterajn rilatojn, ĉiuj ceteraj LS-oj ne havas ajnan rilaton kun aliaj organizoj. Kompreneblas ke malfacilas eĉ siajn proprajn internajn problemojn prizorgi, sed rompi la ŝelon, kunlabori kaj krei ligojn kun aliaj ne-esperantistaj organizoj estas tre konvenaj plupaŝoj, kiujn ĉiuj devas alstrebi.

### **Membro-varbado**

Kvankam multaj LS-oj asertis tion, ni ne konsideras ke paroli pri Esperanto al amikoj kaj konatoj povas esti strategio por akiri novajn membrojn.

La plej ofta maniero per kiu la LS-oj varbas membrojn estas informado ĉe lernejoj, prelego pri Esperanto, partopreno en fojroj, disdonado de informiloj kaj varbado ĉe Esperanto-kursoj kaj renkontiĝoj. (ĈEJ, SKEJ, JEB, JOTE, FLEJA, JEB, KEJ, IEJ, PEJ, JEBUO)

Inter tiuj, menciindas interesaj strategioj de KEJ: "Persvadas membrojn de KEA por ke ili registru siajn gefilojn en KEJ", kaj de ĈEJ, kiuj fojfoje kontaktiĝas kun nove registriĝintaj lernu!-uzantoj. Sed ankoraŭ kelkaj ne speciale aktivis sur tiu kampo (FEJO, IREJO, KEJA, NJE, JELI) dum aliaj ekplanos strategion (NEJ, BEJO).

### **Atingoj kaj problemoj.**

Ni petis ke niaj LS-oj raportu pri siaj atingoj, celoj kaj problemoj, kiujn ili havis en 2008.

Por ne tro ŝarĝi tiun ĉi superrigardon, ni afiŝis ĝin aparte en la TEJO-vikio:

[http://www.tejo.org/vikio/Atingoj\\_Kaj\\_Problemoj](http://www.tejo.org/vikio/Atingoj_Kaj_Problemoj)

## **Konkludoj**

Ni kredas, ke la rezultoj de KODEJO certe povas helpi niajn LS-oj plifortiĝi en siaj agadoj kaj strategioj pere la komparo kaj diskuto de la informoj prezentitaj ĉi tie. Flanke de TEJO estas multaj plibonigendaj eroj, kiuj bezonas iom pli da atento, ankaŭ ĉe teknika flanko. “Google Docs” verŝajne ne estas la plej bona rimedo. Mi havis multe da problemoj por kompili la rezultojn. Do, certe iu kun pli da informadika scio povas pli kontentige rekrei la demandaron per aliaj rimedoj.

Fine, sed ne malplej grave, a ni dankas al ĉiuj paciencaj respondintoj. Nur danke al vi ni povis kolekti tiujn gravajn informojn por ke TEJO povu esti pli aktiva tegmenta asocio por junularaj organizoj tra la mondo.